

四庫全書

集部

欽定四庫全書

集部  
秋聲集卷一

詳校官庶吉士<sub>臣</sub>張溥

主事<sub>臣</sub>呂雲棟覆勘

謄錄監生<sub>臣</sub>孫永治

欽定四庫全書

集部四

提要

秋聲集六卷

別集類三

宋

臣等謹案秋聲集六卷宋衛宗武撰宗武字淇父自號九山華亭人淳祐間歷官尚書郎出知常州罷歸間居三十餘載以詩文自娛据至元甲午張之翰所作集序稱九山墓宿草已六白則宗武實卒於至元二十六年已

丑在宋亡後十年故焦竑國史經籍志載秋聲集八卷列入元人然宗武實未仕元仍當從陶潛書晉例也集久失傳今從永樂大典中採輯編次得詩詞四卷序記誌銘一卷雜著一卷以畧存其概華亭衛氏自禮部侍郎庸敏後資政殿學士涇直寶謨閣涇兄弟相繼以學術著宗武世系雖無考而張之翰序稱為喬木世臣後則當為涇涇之裔文采風

流不失故家遺範有自來矣其詩文根柢差  
薄骨格亦未堅緻蓋未造風會之所超其事  
與國運相隨非作者所能自主至於咏荀或  
一詩稱其徒抱忠貞遺恨千古其學識亦有  
所未逮然核其全集大都氣韵冲澹有蕭然  
自得之趣蓋胸襟既別神致自殊品究在江  
湖諸集上且眷懷故國匿跡窮居其志節深  
有足取而宋遺民錄諸書乃竟脫漏其姓名

錄存是集以發潛德之光亦足見

聖朝表章幽隱砥礪風教之義也乾隆四十六年二月

恭校上

總纂官臣紀昀臣陸錫熊臣孫士毅

總校官臣陸費墀

原序

始余為行臺御史道松江會九山衛公泊其子謙纔一  
杯而別後十年來牧是郡訪九山墓宿草已六白矣謙  
出公秋聲集求序許而未作又旬歲屬者暇愈少請愈  
力因思古今騷人多寓意秋聲中由宋玉九辨而下如  
李太白有紫極宮何處聞秋聲詩劉禹錫歐陽永叔有  
秋聲賦率皆悲時之易失嗟老之將至狀其淒清蕭瑟  
而已今九山之集取名雖同而實又有所不同者昔在

淳祐間公起喬木世臣後班省闕鎮藩輔無施不可此時不獨無此作亦未嘗有此聲也及時移物換以故侯退處於家不求聞達舍大篇短章何以自遣蓋心非言不宣言非聲不傳是知聲之秋即心之秋心之秋即江山之秋江山之秋即天地之秋也聲無窮秋亦無窮彼觀是集讀是序見山谷所云末世詩似候蟲聲便謂誠然正所謂癡人前不得說夢豈真知公者乎九原有靈或聞斯言公諱宗武字淇父官至朝請大夫九山其自



號云至元甲午重九日張之翰序



自序

鴻濛既判三才既奠斯文肇焉象緯森布雲漢昭回形而上者為天之文山川峙流草木華實形而下者為地之文乾苞呈河坤符出洛聖作明述而化成天下者皆人之文秀而為士繇方寸精微發為辭演為章又所以題拂乎天地人之文者也學以本之識以充之才以融之索之浩浩冥冥出無涯而入無淪其思也噓為風霆震厲飄蕩而嵩華若可搖動其氣也怒濤驚湍一瞬千

里斂之則恬夷淵靜其勢也擢犀拔象舉鼎盪舟而猶有餘勇其力也雪月光潔雲烟綿聯疊嶂層巖銜竒競秀其標度也若夫鵬運而無跡龍化而莫名毫端膚寸可使上宇下宙庶類百為被其光彩膏潤此則至精入神不可規尋之妙用也或正或竒或雅或麗或恢詭而辨博或峻潔而幽深或宏衍而雄健其體不一而大要不出於此數者善用之而造其極致則謂之藝成藝成而遠邁衆流雄峙百代登文章之錄者漢魏而下能幾

人斯而率不免或者之譏評則文之為文不其難乎然而昔之作者泯矣復有踵接者焉前之詞藻不可加矣復有軼出者焉是故何歟蓋善割而中其肯綮斯無全牛而甘苦疾徐得心應手於輪何有文亦猶是也經之文以載道傳以明道諸子詩集皆陳義以羽翼夫道者也文而不根於道雖彫琢鍛鍊盡其工芬芳靡曼極其華亦奚取此故曰文者貫道之器也士而言幾乎道其庶矣乎夫子非能言之儔也而與世酬酢不能廢言事

物之來必假言以通其意發其義第求辭達而已非文也坡翁謂辭達則文不可勝用求物之妙了然得于心口者難於捕風則又豈果能辭達矣乎凡如此者十餘篇姑附卷末讀先聖之書業先儒之業顧弗克以一語鳴道化今而善俗垂後以行遠乃為是瑣瑣且慮其藁之淪腐而欲與吟編並傳可憐也已豈惟自憐不為識者鄙笑乎哉昔柳州病張燕公比興不能兼美而后山亦謂太史散語非其所長予何人哉而欲得兼此漢人所

謂猶賢於無所用心焉耳觀者不曰是猶愈於無所用  
心其不鄙笑而唾之者幾希

欽定四庫全書



自序



欽定四庫全書

秋聲集卷一

宋

衛宗武 撰

五言古詩

理學

寥寥二千載道統幾欲墜  
濂洛暨關中浚源接洙泗  
乾淳諸大儒流派何以異  
無極而太極性命發其秘  
先天而後天理數稽其至  
四書共羣籍精微窮奧義  
五常與異端辨析無遺旨  
謂教以漸進謂功可直遂  
為說雖殊

金少曰  
卷一  
科其歸同一揆踐修本誠敬講貫非口耳要在絕已私  
渾然循天理啟鑰以抽關發蒙而警瞶後進有所宗絕  
學得所繼作者蔑以加百世或可俟

君道

勲華相授受謨典所具述其要在厥中精一而允執惟  
誠乃能精惟誠乃能一是以無黨偏是以臻正直三代  
所共守百世不可易伯者假仁義戰國尚詐力漢唐非  
無君文為事矯飾其能粹而王一指不可屈所以無善

治循襲至今日純誠而不褻惟皇斯立極斂敷錫庶民  
懋建昭大德治欲往古如舍此他無術

伊周

誓征黜夏命武成有商邑惟王弗率祖沖人初嗣歷既  
放奉歸亳已攝復明辟前此所未聞浮言曾罔恤二公  
德動天民亦歸其德忠誠靡有他上下素孚格遂以直  
道行觀聽自無惑吁嗟人不古後世幾新室

漢文帝

愷悌而愛人恭儉以持已府庫有餘財勿忍為已費田  
租奉公上屢至為民賜不肯私嬖臣以存大臣體不敢  
私貴戚以貽天下議澹乎無嗜好絕不尚功利斷刑歲  
數百煙火綿萬里禮樂雖未遑亦足為善治洪惟慶厯  
君盛德聚相類爰立俱名臣後元則無是

隋煬帝

方其為儲貳用智固已謫及夫據大器為謀抑何逆龍  
舟及鳳舳無歲不遊適離宮與別殿快意事淫佚置酒

燕要荒會者三十國紫舌與黃支無所不臣服親駕兩  
征遼方且肆窮黷羣盜遂蜂起土地日以蹙惛猶不知  
悟懷諫輒誅戮肘腋俄變生兵刃交于目不肖孰甚焉  
身亡而國覆

留侯

狙擊豈良圖命幾危博浪既受黃石書顛秦而蹶項報  
韓志已酬興漢畫仍贊歷陳借箸計潛消刻印患定封謀  
遂寢立嫡計莫尚轉危以為安其易猶反掌萬鍾誰不

懷裂土人所望何勅身亦繫韓彭國隨喪駕言仙與遊  
高風巢許上

二疏

二君聳高致今古知敬慕勇退人所難尤得所以去貴  
戚舉愛弟將使噲為伍天子尚哀疑抗議非不許儻或  
身久留寧免與時忤駕言盍知止幡然解印組歸來逸  
老壽榮辱一無累鬻金廣田宅拒絕兒輩語多財益其  
過富為衆怨府賢哉乎斯言奚止明出處

孔明

龍卧而長吟，曾次抱奇偉。立心不北向，特為三顧起。曹  
瞞下荊州，氣可吞權備。奮袂為一出，遂成鼎足勢。忠誠  
以輔國，相業難擬議。刑政能服人，怨讎至感涕。出師陳  
惻款，訓誥相表裏。南攻孟獲平，北出張郃殪。司馬亦嚴  
憚，甘受巾幘恥。儻使先十年，營星未殞墜。興復其可期，  
中原安有魏。

荀彧

曹公初見奇直以子房許制勝算無遺覽袁而誅呂意  
見稍有乖幾欲置鼎俎朝端存正論九錫胡不取本初  
固難依姦雄惡可輔初年殲德祖繼又族文舉嗜殺其  
如斯大夫可以去見幾矣不早一死昧所處既不為夷  
齊又不為伊呂徒抱忠貞心遺憾亘千古

韓延之

劉公復晉祚功成萌異志網羅欲用才翦除不附已荆  
州乃巨鎮肯容司馬氏家兒特小過親駕勤問罪延之



乃其客折東謂可致善乎為辭令伐君啖人利誓與臧  
洪俱身殞遊九地啓緘示僚佐事人固當爾背主以從  
讎自昔滔滔是儻使閱此書雖死有餘愧

顏魯公

人之生也直不直匪君子一從平原歸立朝更奇偉挺  
挺盡孤忠蹇蹇陳正義初年忤元載晚節遇盧杞不為  
時宰容乃作天子使正言明順逆兇儔知敬畏未幾變  
異生卒墮奸邪計羅浮寄遠音流傳涉疑似英烈天啟

之萬世凜生氣

知足

東髮至皓首雅意在林谷退閒十五年一官如脫桔抱  
關尋故步謬語不可贖投紱賦歸來幸不至迷復有田  
可餉饑有園可寄目有屋枵然大其中無所蓄代步跨  
款段課耕驅犢餽斗筲量易盈菟裘計已足嘅方際時  
艱已幸免僂辱年豐喜游臻我庾有新穀床頭酒一壺  
架上書數束酒餘取書誦豈不勝絲竹水北與城南蒼

筠列萬玉更須做元亮刺種松與菊招邀文字侶  
噲哦日相屬自足了餘生此外復何欲

春懷

伊耆司化權與物何落落不見陽和敷但聞風雨惡  
柔綠尚含滋水紅慳破萼動植久陵暴至仁同橐籥可使  
令行冬寒威肆餘虐便須轉機括曜靈俾灼爍芬芳千  
萬林薰為紅紫幄庶俾競春徒薄有登臺樂

乾坤日以闢生意日以隘春風一披拂萬族競蘇快肖

金匱要略卷之八  
翹與蠕動靡不忻圻解慶澤流光華垂榮到管蒯山木  
豈自寇孰翦而孰拜根幹儻有遺滋萌乃復在蒼籙溥  
至仁何類不昭泰人為物之靈元化忍獨外氣運何日  
回歲月易征邁

時來桃李妍春風乃知己時去桃李萎春華俱夢寐芳  
菲氣不齊一一理猶是何如松與栢無榮亦無悴浮生  
寄旅亭萬事若流水富貴等空花滅沒無足紀身前苟  
遺臭身後烏可洗我願為松栢不願為桃李長保千歲

安盤根澗阿底

春雨

青皇初布令大塊已流濕霏霏散沖融一一成膏液  
尋夜漏分掀揚風箭疾孤燈月明眼漸覺簷花密滴漉  
聲既洪淋浪勢方集清響迸源泉美澤徧原隰甘腴滋  
田毛浸灌融地脉蓋將兆稔黍豈但秀薺麥溪山鱗甲  
長赤木攢新碧化工悅萬族生意浩無極苟惟本根在  
孰不芽且坼未春雨非土見者自淒惻既春雨非玉聞

者何悅懌未能齊慘舒吾亦為物役英英梅粉露點點  
桃紅入更喜釀芳菲催花居第一

立春出郊風急有作

意行出郊坰迎春二之日不聞條風鳴但見朔風急朔  
風何太嚴厲物無洪纖皆方尚發育豈汝當行權試與

東皇說燠寒宜按節一氣鼓至和要令無天閼

立春前數日尚

覺晴和至立春乃更凜冽

我老值途窮荷鋤今為農但願五時若鼓

腹歌幽風

次韻春

水行苦嚴厲萬彙喜得春解雷久忽震蟄戶奮者殷根  
芽沐膏雨暘暉復熹晨淑氣盎原隰鼎鼎來芳辰小車  
度花陰遊芳浮麴塵少年爭競春外誘何紛紛老矣蠲  
其華寄賢而葆真多吟以為富猶恐道益貧

熙陽薰蓋壤麗景日以新姪姪花媚晝嚶嚶鳥鳴晨紛  
華易消歇非久淪沙塵舉世競芳菲涵若嗜飲醇豈知  
有至味澹然嚕道真試問金谷夫何如簞瓢人

物華來冉冉天氣宜溫溫浪浪但鳴雨浩浩常浮雲誰  
知潤澤中厥有豐美存一朝日出杲絢爛蘋紫羣川原  
徧塗抹紛若粉黛陳芳菲出枯槁何異富易貧難并惟  
樂事昔人嘗有云

方寸負奇偉自足排外紛樂哉曾子履脩然淵明巾利  
欲伐其性智識由是昏盛麗悅其目夢幻何足云不如  
觀文字日月從轉輪飲芳而咀華四時無非春芸芸市  
朝客孰識此味真



春山

青山四時好春至尤盛麗潤澤散冲融華滋出枯悴雲  
根鱗甲動風柯羽旄曳羣芳間點染一碧互經緯組繡  
列障陳續畫崇屏倚嵬昂如帝尊黼黻儼衣被我老得  
餘暇時來領勝事穿雲度舟楫披霧縱屐履消泉幽響  
生鳴鳥繁聲脆天然成妙奏人籟惡可擬息游返靖廬  
紛華以靜對獨坐勘古書冥觀參物理光景猶駒馳色  
象亦蟬蛻至人善觀山夫豈悅浮靡懿此靜秀姿萬古

挹清致

塾樓春集次日和兒輩韻

伊者噓至和薰播彌大地有聲沸候禽有色銜名卉麗  
景接川原浩萬歷歲幾于時不行樂夫人自暴棄卑官  
徒勞人憶昔續賓戲繼忝隸部曹厠迹於朝市未幾乘  
漢郭歸來從綺里誓當守衡茅不復問行李方開陶徑  
荒遽驚周室燬時艱慨適逢身存良自喜築廬傍山樓  
視家如客邸雖存蓬華居僅為燕雀託茲辰薄遊行携

友忘汝爾書樓舒遠眺林芳猶蛻委麥隴連蔬畦青黃  
錯成綺塋色入杯捲山光浮屐底陽春艷欲流霽景浩  
無際獻酬樂佳賓續廣賴吾子朝來補吟事粗不忝詩  
禮顧余八十叟忘我亦忘世醺餘扶杖歸笑語喧童稚  
斯遊固已適未足窮樂意九峯葦可杭相望在尺咫憂  
先天下憂樂豈果在是憂樂存諸心尚堪追禊事

和野渡家園雜興

幽人非嗜石適意在嶙峋萬形何足多一卷未為貧山

奚必秦華水奚必海濱藏珠川乃媚溫玉璞足珍儻存  
丘壑意可障世俗塵烟霞從此生自足怡性真

雅士酷愛竹無肉饑亦忍即之俗自祛對此酌宜引好  
尚契子猷題詠邁元稹二友獨與交十客何敢竝丈夫  
意氣豪少年精爽緊春至長子孫班班森玉筍

誰謂野燒生惡草不須薙為蕭易成叢滋蔓或布地不  
別小人儔恐昧前賢意舞茵含晴曛經帶搖輕吹拂拂  
來野香萋萋動幽思坐對一庭芳煮茶消午睡

綠稠紅欲盡架竹引醅醖歲華晴雪艷汗漫春風枝燕  
鶯相見晚蜂蝶正忙時芳辰似歷塊樂事猶殘暮可憐  
香骨銷但有綠鬢垂春歸恨難挽浮絮盈芳池

已卯雨後春興呈吟友

一氣散冲融生意溢羣動膏澤留涓涓物華來總總孤  
芳擅魁元衆卉遂賓從丹碧互鮮妍低昂相錯綜茵鋪  
五茸稠旆接千林聳為媒想雉驕求友悅鶯啼絲蠻富  
桑疇餅餌馨麥隴耕犁雨既肥荷鍾雲成涓花間車可

乘果下馬宜輕駿尋光景流瀟灑日月送悅情書一編  
舒憂琴四弄九仞功徒勞三逕步莫縱空羨蘭亭遊惟  
存草池夢郊原初駘蕩風塵息瀕洞良辰悵易逾雅志  
浩難控春吟料滿囊春釀香浮甕春水玉交流春山翠  
如涌樂事勿復論幽尋猶可共王謝何人斯吾將繼芳  
踵

竹外海棠

我有三徑園今為牛馬阜傍家尋丈地昔未長荼蓼琅

玓數十挺新培歲可考幻出一庭陰咫尺成深窈客來  
可款延友至或徑造于時正芳菲所欠花繚繞隔籬舊  
封植一種媚而好卷翠護春姿嬌紅銜天巧折來侑清  
尊嫣然為一笑絕勝歌舞羣聲容託幻眇久欲構小亭  
為計恨不早金屋延阿嬌祇恐人易老此花擅春妍獨  
恨易榮槁豈若對此君四時森羽葆不惟祛塵俗端可  
助吟嘯良辰集朋簪杯棹慚草草於焉小徜徉即此是  
幽討

寓蕭塘皆春堂偶成

紅雲逐水流春事隨飛揚昔嗟節序移今苦歲月長  
為蕭水遊物是人則亡西園得逍遙暫寄風雨床  
樂樂荆棘中尚餘蘋紫粧晚芳銜鮮妍婉婉春滿堂  
倚欄俯澄碧浩蕩花藕塘壽栢虬龍姿古桂鴻鴈行  
幽禽三五弄髣髴疑宮商林園豈不好惆悵辰匪良  
辰良其何時世運安有常我欲把犁鋤老此桑麻鄉  
却虞遠城市物怪尤披猖不如依墳壚結茅千仞岡  
寄玄而棲白抗志



於羲黃清泉碧嶂間歿則於斯藏

山行

携友行莫春山南復山北一川去縈紆層林互倚伏舍  
舟上屨顏萬象咸在目堊花銜殘紅柔條曳新綠春巒  
潤如酥春水流如玉芳草浩無涯好鳥鳴相續老閱幾  
歲華看山看不足凡物各有時時去時必復顧我豈物  
如此生何能穀

將到雪隴

春繡如佳賓應接何敢暇我來日與對不覺迫初夏繁  
林湧翠霧經緯密無罅鳴鳥間啼鶯鄭音忽奏雅萋萋  
碧草間暎暎蘋紫亞幽棲絕俗交燕坐陪僧話論事覈  
古今談禪悟生化新茗淪雲濤迥勝酒新醅嘉蔬煮玉  
版可鄙食肉者時誦淵明詩萬慮足陶寫芳春背人去  
歸舟行步駕好山不可載寫入無聲畫

寄道友

憶昨君有行飄飄氣欲僊去作蘇門嘯不覺晚歲年雲

采照高秋盟言尚無愆  
遠音傳征鴻俄乃栖  
冷泉北山有埜鶴長唳聲聞天  
高人遊華胥豈不驚  
晝眠囊中寶苑書香翰徒聯翩  
安得九靈光  
嗟嗟飛我前

自茶塢歸禾中墳庵賦

既雨俄喜晴既晴旋復雨  
老年困肩輿僕夫苦行路  
霏霏霧氣收冉冉陽明吐  
乾端頗收豁物象各呈露  
晴巒含春暉娟娟如靚女  
枯槁變華滋萬綠新織組  
澗花度幽香谷鳥試新語  
勝槩未易窮可挹不可取  
我來事幽

討惟恐商羊舞願天衍霽期助我發吟趣歸來日未晡  
一聲聞杜宇

錢竹深招泛西湖值雨即事

西湖成久別歲月不可記竹君秋豆蘧粉友集簪履放  
船及中流烟靄渺無際宛類太極初混沌但一氣浩浩  
雲常浮垂垂雨不止樓觀列畫圖黯淡微茫裏素粧姿  
態妍於此見西子纔入西陵橋林巒得近似緩步香月  
堂循山歷其址逋僊去何之千古儼清致淋漓雨珠僊

一一浴未起粲然間紅粧臉霞淚如洗餘芳襲壺觴暗  
馥散襟袂十里花柳堤六橋風月地曠色塵舩舩遊履  
不可至昌翔度裏湖兩山濃滴翠中有白鳥閒翩翩自  
遊戲幾年阻行樂謂有公間第棟宇半蒼苔遺汗漬清  
泚興亡成古今感懷重歔歔轉枕通城隄觥籌猶未既  
風生語笑高雲遏歌聲曳斯遊屬晏陰樂事亦足紀何  
時可重來風日待清美

對竹行坡詩意

爾來食無肉所喜居有竹森森無千纛挺挺立羣玉嬋  
娟而鮮潤偏悅隱者目苟使清可娛何妨飽不足小人  
求屬厭君子肯為腹餘生復何為一事無足錄惟應對  
此君細把坡詩讀

賦南豎竹

物得氣之清鍾秀莫如竹是謂東南美羣植可奴僕虛  
心而獨立勁節不回曲傍屋著數挺能洗塵萬斛截之  
作鳳鳴雌雄相配六殺以為汗青奚啻十年讀有體兼

有用迥異凡草木騷人互題品國風嘗紀錄子有步伐  
丘殆類質管谷老筠依雲根錯出勝千陸矯虔相長雄  
高下森立玉霏霏霧滴翠灑灑浪翻綠蟠根龍蛇走密  
葉鸞鳳麇林颺振微響環珮聲夏觸瑣碎流金輝霽曉  
弄清旭熙陽發菁華婀娜舞桂森滋萌長雲仍一一錦  
綢束火輪行長空炎歊暑方酷枕簟入幽深灑若寒露  
沃秋月映嬋娟清影夜相屬歲寒交勝友南枝花倚伏  
四序景無涯風月任追逐人謂小渭川我忝共淇澳邀

朋對此君豈惜醉醺醺七賢迹已遠遺響猶可續冰雪  
生襟袖雲烟散毫牘秋久與可儔寫入鵝溪幅

賦西軒竹

種竹纔一畝便有千畝勢苟能會其趣何拘尋丈地其  
氣偉丈夫其德象君子瑩哉冰雪如潤與珪璋比中虛  
而有容外直而不倚迥非凡植儔惟與喬松齒攬以入  
吟篇引以近書几好之而樂之雅致要相似物清我亦  
清相對乃無愧翛然靜秀姿舉世所同嗜志趣有不侔



肝膽楚越異將以洗凡俗凡俗烏可洗綠猗喻武公金  
壁侈歸美蕭瑟悅宣尼食肉至忘味有之而似之氣類  
由默契此君如有知噲伍亦所恥苟或冰炭然雖多亦  
奚以

為僧賦竹泉詩

竹不可無水有水必有竹彼美槃澗阿碧鮮映澄綠漱  
石戛鳴球拂雲森立玉苟得一以清而况二吾足上人  
要心契母但悅其目物我趣不侔亦恐難醫俗

初夏登北山

春山如佳人形色麗而秀茲來悵非時已入朱明候片  
紅飛不留萬綵新改舊接茵芳草蔓偃蓋古木茂黛鬢  
臨水鏡一色淨無垢戛然鳴聲幽雅弄出禽口得閒此  
夷猶不覺留滯久一葉泛澄川縈回歷農畝決渠散青秧  
耕夫類成偶舍舟挾短筇崎嶇度重阜塋芳氣如蘭冉  
冉襲襟袖逶迤窮山椒寸懷納宇宙川原浩無涯萬象  
皆我有滄溟杳渺間雲夢吞八九昌黎開衡雲羊公登

峴首顧我凡陋資視此亦培塿雖然形氣殊興趣無異  
否獨嗟今昔殊人事有遷貿而我老無聞將與草木朽  
陟巘復降原玄廬新結構伊傳不可慄松喬以為友不  
死非所求姑以佚吾壽

屢月不見山胷次若逼窄舉棹遠相望已漬雙眸碧即  
之清入神喜復遂良覲非但塵思浣頓覺餘疴失玉流  
浸層巒緣雲抱幽石草木去浮誇秋容淨如拭我來誰  
與儔一道兼一釋精廬既窈深靖宇尤邃密吟哦對青

嶂瀟洒娛白日  
奩香勘南華孰為寥天一

出郭望遙岑  
闌冗僅坏土何異龍蜿蜒  
或若鳳騰翥兩岫更奇崛  
不肯與噲伍烟雲或凝散  
日月遞吞吐葱葱氣佳哉  
景物此會府五茸三泖區  
南東淮海距帶接幾百川  
盤亘千萬畝於中不著山  
勝槩將焉取繇茲鍾神秀  
人物亦翹楚所以機雲輩  
落筆有奇語猶嫌氣節卑  
未以勲業許何當地闡靈  
英賢更旁午如眉有翁季  
似岳生申甫壯觀此九峯  
佳名昭萬古

小園避暑

六月畏酷熱簟枕依林塘古木同臭味幽鳥含宮商天  
孫雲錦機丹碧交薦香晴瀾泛清薰襟袂生微涼巉巖萬  
石間修筠間新篁羽葆列千挺灩灩浮綠光林飈一夏  
擊環珮聲鏗鏘披衣獨危坐意氣超羲黃豈惟熱惱除  
冰雪置我腸却愁林外人久苦炎威張天瓢忽傾倒旱  
魃宜消亡是月已火流不日占金穰時雖厭兵革人或  
飽稻粱此園僅如握無徑不就荒猶喜卉木存弗為斤

斧戕揚揚桂吐芬粲粲菊有芳清賞備四時花辰復青  
陽太平本無象嗣歲或小康於焉盍朋簪一笑傳清觴

久晴喜雨詩

日夕庚暑裨無以祛熱惱甘霖從何來雷轟電光繞勢  
如天潢翻滂流決清曉六合開新宇一氣蘇羣稿涼颼  
散窗戶炎熇泯如掃從此協雨暘免使虞旱滯庶幾  
賑原俱斂穰穰寶大東與小東民力差已耗天公匪  
憤憤善應固有道未憂供百需且欲資一飽維魚行協占

焚厓頌有昊

立秋喜雨

天心本至仁生意豈有息  
粵從書夏五甘霖絕點滴  
涼風自西來時送中夜濕  
田腹泯龜文屋角掛龍骨  
我稷與我黍實穎而實粟  
屢豐固難望一飽或可必  
豈惟曾孫庾如坻亦如櫛  
滯穗不斂穧可續窮民食  
但虞耗鼠雀尤恐資螟螣  
願減漢民租少裕東南力

甲申過北山高祖大夫墳庵見盆芝

我祖藏北山昔嘗產紫芝庵以此得名且將二百耆耳  
聞非目接至老心猶疑一朝地闡靈枯槁生神奇眩眩  
根幹間挺秀分三枝採者不善護猶惜其一遺移置盆  
盎中赧黃互相輝豈殊子聞韶不圖樂至斯第嗟魯獲  
麟所出非其時吾年已如此斯祥將奚為獨思避世士  
尚嶺其在茲

是歲之夏紫芝復生成叢大者徑七八寸

異物不易遇其出由地靈伊者聞坤珍三秀既挺生賦



形雖恨小殊喜見未曾朱明復薦祥僊種茂叢莖小者  
既敷腴大者尤輪囷周遭徑盈尺菌蠢疊成層團團盤  
赤玉艷艷盃紫金霏烟氣蔥鬱映日光晶熒神芝產冢  
阜歲久迹已陳不圖餘七袞一再見斯今有開必有先  
休符不徒呈老矣百無欲弗願在其身所積顧不厚敢  
覬及子孫惟冀福吾宗以洎邦之人皇穹其畀矜茂毓  
賢與英出際風雲會為世建太平漢代歌芝房其事不  
足云致君堯舜上朝楚涕頌聲復見祥冀敷豈但朱草

榮散為天下瑞郁郁而紛紛

秋懷

秋空日澄霽秋氣日蕭瑟  
塞馬健嘶風候蟲悲弔夕卉  
木斂華滋天地失顏色  
來鴻謀稻梁飛隼快搏擊  
人境頓淒涼物情亦悽惻  
憂愁豈無端感歎繼韓筆

涼颼翦菑翳萬山縮鱗甲  
水鏡滓不留千尺見毛髮淒  
風日以高物華寢腹削機杼  
軋晨霜砧杵搥寒月孤暎  
不成寐耿耿至明發  
何處一聲秋停雲吹欲裂

往事挽不回新愁推不去秋葉既辭柯滋榮春復吐榆  
年逝如流顏色寧反古展書聖賢對援琴兒女語撫時  
耿予懷聊以釋百慮餘生欲何為將隨草木腐

衰質蒲柳如日夕就枯槁往夢桃李春其能幾日好志  
業亦無成飄零逐衰草浮榮豈足懷妄念猶風掃陳言  
亦刊落損學而促道誓當與世違山林以終老

秋至山愈奇獨不入凡目翳蒼既掃除清峭如削玉剝  
落千林空中有歲寒木雪霜自凝沍柯葉不改綠猶夫

古君子凜不可榮辱貞心以自持烏肯混流俗

浩浩秋水生江河若放溜翳滓一洗清山川愈明秀惟夫沮洳區朝滿夕已垢疏滌曾幾何起穢復自臭何異賤丈夫逐利日貿貿委志合羣汚氣類不改舊

屋隅一握地歲久寢蕪穢茲晨命僕夫疏剔淨無翳洞目增秋明彌襟挹涼氣春葩已辭榮柯葉猶蔽芾晚芳繁黃金新篁間幽桂欲幻小池亭西風幾淒厲只今欠一死肯作百年計

秋山

秋山抱奇姿不肯事嫵媚猶夫塵外士飄然有仙氣霜  
風肅宇宙林壤去菑翳皮毛剝落盡玉骨乃挺異獨存  
歲寒枝虬髯倚天翠我來一事無兀兀惟坐對挾策詠  
聖涯援琴奏流水方寸如太虛物類無點綴但欠淵明  
菊得酒莫與醉賴有坡仙竹無肉可忘味老懷藉陶寫  
俗好非所嗜平生愛山癖每見如久契勿云丘垤如泰  
華所眇視吾心與境融小大無異致行行陟其巔天地特

一指忽動九辨悲清愁飛海外

山行鄉友遺五言

一雨如膏沐秋山為我容誰云乏神秀遐想猶岱宗絕  
無喜僅有疇列茲羣峯繚繞若仙城花但無芙蓉幽香  
含桂菊積翠浮杉松生平嗜林谷不厭來輟重幾躡靈  
運屐屢扶張騫笻驚朋與鷗侶足為談笑供折簡不可  
招欠致人中龍毫端具造化物象工陶鎔吟思方淵渟  
風撓鳴淙淙佳章忽在前撩動此興濃君胡倦一出嘲

詠乃不備且勤遠致饋與客叨殮饗

北山回櫂

高風掃羣翳山色秀而靜寒林隱虬龍幽徑行蛇蚓場  
登穉紐實水弄芙蓉影明發汎歸舟秋空更青迥

賞桂

駕言適東野聊以慰離索攝齊甫升堂開尊隨命酌芳  
鮮羅果羞珍重如宿約主客成五人爽氣涵秋嶽風生  
雄辯豪春容笑語狎曲徑行委蛇幽亭恣盤礴團團駢

翠樹一一耀丹萼歲蕤花四出氤氲香徧達方恨負清  
賞不料此行樂有女嬌姪姪有子見頭角舉觥競屬賞  
此情尤不薄英英晚節叢芳意滿籬落載酒儻重來應  
無爽宿諾

約友秋賞

秋霖蕩殘暑林颼鳴策策乾坤灝氣浮萬象互清發望  
舒散天葩拂拂餘芬落霽景行澄鮮三五圓素魄有團  
那敢窺有友那敢約金吾不放夜孤此月華白鱸肥蟹



可持棗栗稻且獲黃雞與白酒樂事正參錯胡為抱空  
悲常若遠行客靖節存高風黃花漸班駁吾儕于此時  
何忍負杯酌東郊稱行樂鄰壤富林壑邀朋踐前盟須  
造子雲宅

星夕前露坐觀行雲有作

一氣有聚散變化莫能測氤氲彌太虛膚寸絲觸石翕  
如華蓋張紛若織纈摩緝緝鯨布鱗翩翩鳳展翼祥或  
旗為黃綬或珥為赤友風而子雨俄如翻墨汁白衣與

蒼狗怪狀殊不一露坐晚觀天肯近雙星夕  
霭霭從何來於縈絢金碧突如怒濤湧屹若  
奇峯立黼黻盛彰施文繡爛組織良由天孫  
巧匪自屏翳出我不為柳州去拙有所乞我  
不效汾陽榮進占所得但願煥有章落筆成  
五色毋使若貝錦胥讒以作慝傷哉杼軸空  
民力敝東國安得化為繒散漫浩萬匹衣被  
此一方羣黎徧爾德仍須語河鼓牽牛勤負  
輓勉耕左角田雨作蒸民粒穰穰俱滿家庶  
以給冗食

為葉賓月賦

大乙涵中精凝聚為夜魄皎皎行長空高圓競明發流  
輝大江湧散影千林刻騷人抱負奇一氣清相若有主  
此有賓不勞折東約悠然來几席玉色照肝膈對之啓  
榮齒嘲弄不為虐累累噴珠璣華采互呈豁銀闕或未  
完要君施斧鑿乘風到廣寒一笑翻成客

和人襍詠五首

幾年抱渴襟既見名副實擬為嵇阮交愧匪秦晉匹風

翮翔空冥遠避弋與畢汙世待澄清其可事一室駕言  
投吾簪終為清廟瑟

窮秋菊薦香小春梅破萼時卉互芳菲榮悴異今昨憶  
昔競芳妍徵逐困嗟酌老去厭浮華雅志在林壑浩歌  
太冲章願赴招隱約

鐵研窮鑽研知君用心苦撐腸書五車何異羣玉府榮  
然以成章雲錦工織組逸氣劇屈賈餘子何足數八詠  
俄頃成落筆傾風雨

世榮易消歇猶歲多旱滂又如紅紫芳焉得四時好豈  
若潛窈深攷古而學道葆真育其蘇英華發枯槁出處  
明所宜慎勿為小草

矯矯鶴盤空雖雖雁鳴旭過雨沐遙岑一日浣塵俗久  
欲抱琴書栖霞漱澄綠劉安鷄犬仙世豈無其術一笑  
秋水橫飛來雙白鵲

晴空擘絮雲殘雨收綫溜晨興咀落英風露入懷袖  
遠水浮秋容吟墨寫難就碧山吾老友扁舟擬訪舊公

肯從我游茗飲烹乳竇

再和易後韻為前韻六首

多公苦嗜吟殆類書癡竇水火燥濕全一見懽如舊七  
步未為敏百篇可立就咀嚼牙頰香氤氲滿襟袖渾渾  
乎其來勢若鈺建溜

黑不待黔烏白不待浴鵠天分既超卓能消幾學術飄  
飄霞外婆瞳方而髮綠滿腹貯古書咳唾可祛俗冲氣  
以為和陽春散晴旭

妙語來翩翩賡句慚草草一鼓再則衰氣痿腸亦稿詩  
不造風雅可觀徒小道書能破萬卷篇章自然好淺學  
無根源易涸如潢潦

西風葉滿庭敲枕聽鳴雨悽然百感生愁緒未易數思  
昔詠干旌良馬素絲組今為白屋夫低頭拜官府猶喜  
七十公可免差科苦

懽猶程孔交來匪張范約豈但投館粲雅與同丘壑我  
圃三徑荒幾年負杯酌秋葉與春花今幸復還昨園丁

報新陽早梅紅破萼

欲絕子期絃肯鼓齊門瑟諫官不足為孰可挽少室然  
當展素蘊佐主為召畢志在澤斯民思與鄒軻匹難作  
遜世翁江梅有佳實

題張石山出行吟卷

峩峩章甫冠飄飄凌雲氣安肯鬱鬱居乃試遠遊履風  
雲負壯圖川原窮雅志槐竹憩幽深草木全臭味滄溟  
浩八極呼吸入胸次物怪千萬狀參錯入吟思一篇復



一篇疊疊至百紙芳菲迷目曉璀璨照牕几展玩三過  
讀殆類噉蔗美漸可造冲澹豈特銜巧麗章句亦何有  
尚辭尤尚理風行自成文止於所宜止熟之而精之循  
能造極致老我力已衰不復競吟事羨君年尚壯進進  
殊未已駸駸班前修挺挺俯時輩豈但薊北傳可使難  
林至

雪晴

歲窮候嚴沍木石凍欲折寒雲盡四垂乾坤清氣發僊

人唾珠玉瑣碎自天落神功忽收斂聲光隨息絕暮夜  
風怒號飄泛動几格老夫卷書坐燈焰耿明滅爐存火  
已微餅罄酒莫索擁衾作龜縮毛骨冷於鐵皓色倏浮  
窗疑雪復疑月推枕晨啟扉金烏已赫赫桃符即換歲  
椒盤行送臘誰其呼滕六為我作三白

北山遇雪

天公倚天巧三見臘之時似花還非花袞袞縱橫飛瀉  
竹振清香壓梅迷真蕤烏免耿無光遁跡不敢馳雕鏤

各成形磊塊或作堆蔽空來若塵著物明於璣武騎當  
此際縱獵方打圍森森紛甲刃爛爛光相輝豈若灞橋  
驢領此一段奇今朝積數寸回眎覺昨非比屋占農祥  
津津喜上眉對書明徹眼煮茗清入脾肯為素安臥宜  
賦劉叉詩呼童掃松逕迎客扶桃枝

再遇雪

窮冬滯空山風雨何淒迷馮夷工剪水有技不肯施俄  
於夜未分六出紛歲蕤但見草壤間疊疊生玉枝須臾

遂彌滿匝匝生四圍突兀千丈高浩無膚寸遺寒林遠  
映帶一色相參差天工呈大巧幻出此段奇遂令翳薈  
間瑣碎玉作姿安得借化冶烹鍊如銀為勿使見睨消  
有若朝露晞巨靈與夸娥負挾從我歸以此幾差我森  
列置八維為民除熱惱盛夏祛炎威金石可流燂天瑞  
無變移良宵著明蟾逶以波琉璃四時照吟筆千古凝  
清輝

所居遇雪

去年雪於臘見覓跡已滅今年天作花再白遂凝結鱗  
鱗薨相接爛爛銀互疊平尺雖未盈皓若布層氎洪纖  
歸一覆高下同至潔入夜更飄揚未久復匝匝打窗明  
映書堆垣厚成堞披衣起推戶勇不待明發庭間數十  
挺葉葉如楮刻牆角南北枝艷艷疑花壓遙想幾青山  
幻成玉萸葉郊原瑞色浮穹壤和氣決豈但疵癘消可  
卜豐穰協書生喜無寐但覺吻囁囁掬之滋嗟觴石鐺  
煮團月

北山值雪偶成

民象涵萬有佳趣備四時此行屬寒冱喜遇臘雪飛瑋瑋初集霰粲粲紛葳蕤奔騰漸成陣勢作龍鳳馳森森千碧林緣飾如珠璣旋觀壓層嶺爛若銀成圍一天散和氣萬境凝清輝飛揚到朽壤臭腐為神奇問山何幻怪頃刻顏面非蒼蒼改正色皓皓浮鬚眉我來逢此瑞爽塏流肝脾對之豈徒酒而可不以詩因詩探山意春信橫南枝

次歲雪後作

伊耆令將行玄冥車載轄玉律歲肇新一白至再白三  
冬望上瑞猶喜在窮臘霽然冲氣布潛可弭凶札積之  
近盈尺豈但宜黍麥化工尤善幻散集總奇特飛颺湯  
天來龍鳳相擺擲萬殊無兩色大地總明潔初疑散花  
女空中碎裂帛俄成古佛居移下爛銀闕玲瓏千萬林  
一一如玉刻梁園曾未春紛紛徧遊蝶飛鳥迷所栖狡  
兔失其穴乾坤淨無塵川原互清發我輩當此時意氣

倍軒豁顧慚海上夫餒欲和旃鬻濱死氣不衰挺挺抱  
奇節且非邁古才閉門眠自若藏器以待用內蘊經濟  
業祇有健吟哦舍此無他說雅欲訪古梅一笑邀皓月  
開樽約勝踐共對此三絕夫何見睨消非久即變滅是  
固雪負子抑亦予負雪

冬留紫芝庵即事

玄冬適莽蒼霜宇更闌寂繫舟山下路窈窕松關入一  
榻寄僧居幽雲生卧室明朝過東山千尋更砥碑丙舍



尤杳深寒林互盤屈孤楓綴餘丹萬竹錯叢碧天寒鳥  
聲靜木落山骨出飲無客獻酬坐有僧分席一盃復一  
盃不覺日之夕林鳥欲歸栖翩翩競翔集萬點布平田  
有似坡仙奕此行為訪梅東尋復西覓俄見影橫斜蕭  
然倚山壁中有第一春絨藏何太密數日我重來要見  
南枝白

天寒留滯山中即事

逾月留窮源不覺歲云暮緒景寢淒涼重陰方固返芳

叢菊殫殘丹楓葉飛舞蒙茸豐草萎剝落喬木古茲來  
遂幽尋所恨乏勝侶釋友間往還農父相爾汝索句課  
唐吟繙經勘佛語肅肅繁霜零輝輝寒月吐夜氣消繁  
燈凜威薄衣絮楮拙煨爐紅輪困擁衾素噓呵冷欲冰  
拳孿宿如露老瓦補茅柴破釜煮栗芽烹鮮遠莫致擷  
蔬美可茹氓屨絕紛囂僧席割清苦頽然撫孤蹤樂哉  
忘萬慮亡何歸興動適為物怪忤舉手謝白雲扁舟鳴  
去舫

留墓松

青青冢上木夭矯摩太虛日夜之所息雨露之所濡其  
來至高曾奚啻五世儲偉哉廊廟材而受斤斧屠其間  
鍾異質形氣與衆殊小者近十圍大者百尺軀九苞鳳  
可巢千載苓可耒難以刀鋸加俾與玉石俱留為龍鸞  
種要產駒與雛咨汝二十二結交猶朋徒共期松喬壽  
以衛龍虎區子孫其保之慎勿使剪除毋微發冢儒假  
辭取珠襦羣栢既就殲所存能幾餘時哉能得已涕泣

而長吁

伐墓松

鬱鬱乎佳哉古松茂而秀封植難計年龍鸞相錯糾天  
風動清籟洞庭喧雅奏護之珠玉如期以金石久夫何  
從斧戕山木豈自寇衆咻謂宜然一謬固所否梯航方  
勤遠斬刈或恐復衆巔已成童懷壁豈吾有欲為狂瀾障  
無奈鑠金口幾世培梁棟一朝等薪樵壤樹其可芟不  
覺眦飛溜惟思植萬本易新以補舊初如牛羊散漸見

蛟虬走庶保墓域安盤錯至不朽

歲冬至唐村墳山掃松

憶昔入此山首夏接春季谷鳥正嘒嚶芬芳尤嫵媚青  
青交道杉森鬱互參倚誰乎一叱咤斬艾如草薶遂令  
墟墓間常抱斧斤恥僅存盤澗松綽有虬龍勢矯矯千  
歲姿昂霄猶舞翠我來省松楸適當谷之昧石齒咽殘  
流鳴族息羣喙木石縮羽鱗風霜翦菑翳豁然眼界清  
如至人境外意行步崎嶇白雲生履履林光漬欲流冉

丹濕衣袂僧來入畫圖人行絕羶毳風塵不可到心跡  
兩無穢追尋得良儔清吟可相配不效互唱酬日與青  
山對茲游擬暢情俄值風雨晦漸喜迫新陽天地寧久  
閉屋角數點明冰花送春意

獨鶴

獨鶴來有年置彼三徑曲挈至此靖廬幽絕山林屋夏  
然發長唳清亮振虛谷炳炳千歲丹不受烏兔促乘之  
雖有軒頗窘筋骸束寥廓萬里心夫豈在食粟一舉窮

紫清真境可洞矚奈何剪其翅殆類驥繫足然雖啄菰  
恩變化乃迅速昂昂禽中仙未數昆明鵠

過茶塢子舍新塋

自閱管郭書風水好成癖維舟走雪嶠川谷幾徧歷晚  
年乃得此於焉擬藏骨身謀適不偶命子為冢宅癡兒  
好侈大治庵如考室豁然天地寬有若混沌闢層巒猶  
連城一一互拱揖案後三奇峯參倚而特立端然顧其  
穴宛類鳳展翼又似老泉翁二季侍其側啟戶儼若臨

朝夕在几席回頭看新月對面賓出日鬱乎氣佳哉秀  
異鍾一窟神剗與鬼剗天授非人力一丘有如此萬金  
買難覓羊眠協夢祥牛卧兆墓域地將發秘藏人已產  
英特吾家顧未然貞符在種德為善斯有慶積衰由作  
惡素履或未純青囊惡可必要須法獻武粹如圭與璧  
戒之而謹之箴儆毋我忽庶或生賢貴簪紱可世及不  
然負此山山亦有慚色

和趙蓮真琴



豈無五尺桐所貯徒百囊惟君匣中材古韻涵混茫高  
山與流水雅趣深可長古人寶清英今君豈殊揚鏘然  
出金石振厲如歌商毋惜一運軫冰雪置我腸

和趙蓮真劍

豈無三尺鐵巧事犀玉粧惟君匣中藏百鍊侔步光小  
試鋒莫當崖石中開張會須斬姦邪眊眊神光揚未遜  
古佩刀公輔誇王祥斯物由天成匪但工之良

次韻酬李黃山

吾儒何所事讀書而挾策君才郝林枝靈根方正發筆  
下富詞藻雲錦自天落英英光嶽氣灑灑冰雪魄中秋  
璧月圓宜赴廣寒約桂籍那未香天公無皂白學如禾  
與稻既藝宜必獲于時誤儒冠孰不嗟鑄錯篇章來聯  
翩有主此有客隋珠既璀璨和璞無踳駁有文可與評  
有酒可與酌長吟不淹宿捷若蛇赴壑喜得羅庾儔吾  
鄉宜卜宅

酬鄉友惠詩

乃翁不遐遺招邀至宅里芳馨秩俎豆聲歌列紈綺壽  
色實庭椿天芬鄰枝桂皤皤七十叟義方嚴教子大兒  
書滿架心惟醉經史金朱非所樂飲食能知味篇章落  
咳唾葩藻振奇麗月眼老增明三讀使子起小兒暨若  
孫未遑試以藝具謂善吟哦抑亦工誦記庭蘭其在茲  
芬芳殊未既

懷南塘朱省閑

我如蟄戶居跬步不可移君有遠行役暑途方驅馳覘

知所如往謂已杭雙溪人苟懷忠信蠻貊其行之平生  
玉雪襟節行所素持督運奉省檄迨今已數期故牘出  
袖間數不差毫釐皓皓其可汙皎若明鑑垂堂堂大司  
存肯計銖與鎰往事等塵埃意者窮奸欺奸欺固莫逃  
賞識必見奇豈惟憂責無可以歌嘯歸獨念行路難蘊  
隆丁斯時埜有喝死夫何以當炎曦越山未易登其上  
號狐狸越水不可厲其下多蛟螭鬼魅常瞰人往者來  
者稀毋為巖壑娛返旆因遲遲粵從軫既東一日腸九

廻桂秋俄已近數日盼歸期

謝朱南塘借已田為易陸宅山建玉宸道宇

好山未易得况此不多山靡迤八九丘遠眎猶彈丸幾  
截謀一區經營何其艱尺求而寸予徃徃人所慚丙舍  
西復西一岑頗嶮屹其坡委蛇垂宛若縈帶聳又類立  
大纛轉幟風飛翻其中似掌平可為宮與壇荷君割膏  
腴易置為我懽斯舉昔罕聞豈但今所難得以奉帝尊  
峻閣而危欄顧惟匪陶頓奚以役僣般蓋由心願欲寧

恤家殫殘于茲延真侶亦足化世頑報乏千鎰金感著  
方寸丹每嗟隸黔首孰若儕黃冠惟弗叛宣尼何妨師  
老聃斯宇儻落成屈致居其間玄玄五千言言言推其  
端看生白室光相對清晝閒學道能造極何必三神巖

和葉楚渡易古銅瓶韻

此方而彼圓何異冰與炭彼工而此樸土簞眎玉璫達  
人以道觀萬殊等一貫我有四耳尊自謂今之冠刻畫  
盡精微光澤加璀璨流傳知幾年器不減周漢肯使居

水湄敬用如始盟殆類古壘洗盆盎不可亂以好易所  
好在昔有公案張硯晉卿石坡老詩可按于以篤心盟  
豈但榮目觀緬思古之人未嘗不三歎君家螭文壺相  
去未能半癡兒厭家雞咄咄求互換四美欲其并片言  
為之贊慨然湖海襟弗以錙銖算捷于響斯答不寶已  
所玩折簡墨未乾訂金言靡叛信云義易利殆類畊遜  
畔將以春容篇溢目珠璣粲捧持簪春花恨無雙玉腕  
凡物各有匹以時而合散干將與莫邪蛟龍可水斷方

其埋豐城雌雄元未判神光射斗牛如烈山以鑿方冊  
紀載詳晉史稽所竄一謂歸張華一謂屬雷煥變化復  
成偶奔逸不可絆嗟予父義方所謂亦云謾求得既膺  
銘負慚尤汗渙命之謹所藏珍重勿褻翫子孫其永懷  
豈但目前看

為雲侶天游賦

汗漫可以期列缺可以至豈不高且遠未足詣超詣至  
人悟重玄妙境此融會無聲亦無臭萬象於我備不必



八柱承不必二極繫曾城九重居儼若具乎內於焉以  
伴真其樂浩無際氣凝而神化舉步六合外乘輪閭風  
行稅駕丹丘總逍遙兮周流斯特跡之際混然吾太虛  
遊是息於是

贈潘天游

乾以健而運如轂不停息周流徧六虛升降靡差忒故  
能權四序而以轉萬物茲其氣之遊造化由是出一元  
亘終古塵劫浩難詰人有貌以生於中具太極苟知法

天行折旋而闔闔浮游潛深淵外想不內入亦解長不死壽與之為一

寄徐清溪

清溪溪上山九山山水遙相望美人隔千里飛鴻來遠音老鶴喜得類望履杳無從豈或尼而止採蘭以為贈折梅以為寄芳馨匪常存懷想惡能已吾衰年幾何歲月猶川逝理奧欠析微書囊未窮底古杭可葦航溪流迅如駛雖爽菊秋期花時更清美

次青溪後二章為別

季世思良士如抱渴與饑  
峩峩章甫冠瑞氣浮芝眉粹  
然君子儒赴我同襟期  
凡林非鸞棲丹穴仍歸飛恨無  
健羽翰所至相追隨  
懷歸宜莫留荊州那足依

今古多紛攘宇宙彌氛埃  
故友晨星然徃徃淪劫灰幸  
得莫逆交子與從子來  
道義本契合心跡無疑猜  
不徒千斛舟置此坳堂杯  
動靜必與俱書林日徘徊  
一聞驪駒駕黯然腸九迴  
從今子陵臺目睫常鬼鬼

劉錦山自衡州歸復書仍貽之詩

渺渺湘水波浩浩衡山雲悠悠我之思皎皎兮美人美  
人不可見陵谷日遷變風塵方紛攘意者生死判鴈來  
信可通豈若重會逢恨無健羽翮萬里飛相從腰下黃  
金佩人間紫馬貴還疑袞繡身易奪丘園志鶴髮幾七  
旬年與君為隣交至老彌篤恨弗時相親急流中勇退  
一舸歸私第俄傳尺素書讀之喜不寐願堅如蘭心共  
締松菊盟毋貽林澗愧復動軒冕情皓首金石契何異

園與綺昔日良友朋今為老兄弟

過秀城

舟行過鄉城憶昨又三載鶴表人或非雉堞址仍在郊  
郭幸苟完室廬俱可慨十年遠親友一見如有礙胡為  
窮紀次際此遠行邁歸來椒栢新德人年未艾

贈趙月麓之雪

乍合成乍離歲月何飄忽重來吾愈老喜復遂良覲月  
麓號新改簪裳亦殊昔議論羲皇前咳唾煙霞出囊中

詩一編語到不可及清圓粲珠璣雅正諧呂律新吟多  
感慨能使鬼神泣洗耳聽談玄有言皆造極豁然啟其  
蒙不覺膝欲屈一碧涵千峯吳興山水窟來辦結構資  
丹砂鑄僊骨魯公千載祠已仆誰復植新宇儻落成端  
莊厲忠直滔滔姦佞夫見使心怵惕雖為老氏徒未廢  
儒者術我有招隱廬亦足以棲白安能挽之留共勘先  
天易

送人

荆璞雖未琢須成圭璧珍嶧桐雖未弦須奏雲和音抱  
此材質良識真豈無人薦進居禁嚴持美以效君永為  
廊廟器陋彼瑚璉陳胡然久賢勞展驥滄海濱

送林松壑

彈鋏歸來乎暫作蘇臺客昂昂歲寒姿依然返故壑詩  
卷浩千萬斗大室難著往哉掣巨鰲肯戀華亭鶴

答野渡塾賓并其子和篇

唐人尚五言秀句推柳塘復有善鳴者鷄鳴傳達商氏

名幾百載郁若蘭芷香詩來破餘暑如挹風露涼芬敷  
富辭藻鮮碧逾叢篁鋪張几案間蔚為前修光讀之律  
呂誥擊拊鳥聲鏘可踵翰林白未遜太史黃東屏斯文  
主書傳撐滿腸固宜蘇門客而有晁與張豈但如昔人  
風雅能補亡胷中千萬篇浩若五穀穰况復有小坡氣  
習遺膏梁書林惟日涉藝圃無時荒內有芳潤融外茂  
聲色戕篇章雖後至巖菊擅晚芳又類秋芙蓉水鏡臨  
夕陽顧惟糠粃揚凜負荊棘芒嘆予以詩隱貨藥猶韓



康何時天朗清共泛蘭亭觴

贈白湛困

老窮蟄一室獨與聖賢對  
禍刺倏在前喜有佳士至此  
客可曾有良覲今乃遂夫  
豈燥濕同未易折東致鄉鄰  
道不謀咫尺楚越異張范  
志苟合千里盟弗背蟠木何  
假容猗蘭蓋全味吟詠浩  
篇章口誦卷壓几湛然珠在  
淵晨夜光明媚譜接唐人傳  
句與唐人儷滿貯風月襟  
迥絕煙火氣筆下戲羣鴻  
尤跨虞薛輩樂哉得新交風

期從此契張鼓於越門聊為歲月記

即席贈太陽山極圓上人

招提幾百載其來自唐室屢此繫扁舟過門不暇入豈  
圖今之行招携叙舊室遂停欲歸櫂重整倦遊屐粵昔  
有高僧斯地曾卓錫湛然一方泉千歲停寒碧古殿倚  
太陽佛光含慧日巍巍屋上峯森森庭下栢禪房窈且  
深竹樹尤靜密開尊具濁饌領客日至夕久要亦所難  
此意豈易得探囊出詩章徃徃名勝筆誦詩所以名極

圓而圓極

錦山自杭來詩呈鄉曲共舉月集

歲月易以邁羲娥不停旋憶昔聚嬉戲編髮今盈顛日  
往而月來壯逝老至焉交情貴浹洽良辰忍棄捐簪舄  
要時集尊俎宜相先聞風益所無議論攻其偏急難援  
心勇友助勞斯宣里閭皆吾與疾苦毋吝言惠利苟可  
及念勿遺顛連杜門惟獨善此見恐未然良朋去七載  
歸錦榮山川盟鷗思海上訪鶴來雲邊胷中五千卷筆

下琳琅篇尤當會以文雅好庶不愆真率月有集舊典  
猶可公洛社多尚齒尚齒則未便何如倣修禊少長無  
拘攣光風獵獵長萬象皆暄妍四時有佳致陵谷縱變  
遷山巔或水際竹下并花前高吟吐風月逸氣噓雲烟  
煩襟可洗除芳景宜留連毋徒嗟百罹一笑觴互傳

贈龍虎山甘道士

袖携尺素書遠從上清至曾涵龍虎象語帶煙霞氣千  
古夔牙音指下發其秘為鼓桃源行桃源何處是

和南塘貽林丹巖古風時丹巖館郊外

丹巖今良士南塘古當時館餐未有適義圖以助之渠  
渠推轂心終莫副所思遇合各有緣天只非人為裴回  
明月枝乃在海一涯一字以拔人我慚蔡子尼遂使文  
字交遠邁為人師騷壇不可即比興安所施唱酬懷舊  
章絢若辭藻摘細玩二君詠形神坐欲馳蹤跡有聚散  
情意無盈虧非晚即簪盍寧久成訣離傳雲思親友且  
和淵明詩

夜坐待月次日補吟

瑤壇禮碧虛返次羽人坐引脰延月華吞吐隔翠墮衆  
吻盼流芳冉冉忽透過大規雖微虧猶喜鏡未破浮翳  
從何來掩蔽仍不果連巒一色淨清輝千里播爽塏入  
襟裾光明生咳唾詩翁於此時枯腸正無奈愧乏雲錦  
章翻然乃高卧斯辰悵有懷無語坐偷墮今夕冰輪升  
不吟則不可預解素娥嘲免謂翁負我


再用韻答和者

依山構靖廬雖陋亦可坐幽林隔塵囂邈迹八九隕時  
來友高士一歲知幾過埜花薰醉醒山鳥啼夢破何莫  
匪真詮豈為崇小果頗喜仙侶稠可使玄風播道腴足  
雋永世味等涕唾谷神儻不死造物何能奈多君從我  
游白雲肯分卧第嗟屋宅壞殆類甑已墮內煉悵莫成  
服食其或可伯陽丹鼎餘刀圭分贈我

慰張石山幼子亡

無子雖可悲有子未為喜斷以釋子言莫非假合耳杜

陵詠為麟瑞物能有幾昌黎謂之梟惡德乃類是無之  
恐無後有之亦為累苟非弗克肖曷若聽其逝顏路之  
亡回宣尼之喪鯉此皆長而賢痛甚于幼死夷甫雖嘗  
云情鍾在我輩過哀亦奚為安有復生理子夏空失明  
季札號知禮吾友方盛年何憂乏良嗣





欽定四庫全書

集部  
秋聲集卷二

詳校官庶吉士

臣張溥

主事

臣呂雲棟覆勘

謄錄監生

臣龍舜耕

謄錄貢生

臣湯逢泰

欽定四庫全書

秋聲集卷二

宋 衛宗武 撰

七言古詩

和友人新陽韻

生機天地寧終藏，剝極復反開新陽。  
陽明漸進陰濁散，輝光萬象重佳祥。  
不必晷驗度合表，不必風問來何方。  
朝廷有道雨暘若，滿家五穀歌穰穰。  
占年梅映臘雪瑞，回暖柳拂春晝長。  
願君多送錦繡句，為我一洗冰炭腸。

陽春一曲和蓋寡  
媿我蕪陋匪報章  
獨思愁嘆接田里  
安得擊壤衢遊康

為徐進士天隱賦辟穀長吟

物盈宇宙皆有窮  
一氣先天常浩浩  
榮華富貴能幾何  
百歲光陰如電掃  
開闢由來莫幾年  
聖哲英雄骨俱槁  
勲名蓋世文瑞時  
豈若玄玄窮微妙  
古仙率多山澤癯  
方平通經後從老  
伯陽隱士著參同  
援述宣尼辭可考  
人身口腹乃大患  
舉世凡夫為此惱  
厚味腊毒尤傷生

甘旨肥醴偏害道學仙萬慮要屏除有累俱為方寸擾  
希夷辟穀功始成抱朴休糧法宜效所以丹丘諸羽人  
莫不餐松茹靈草誰云不食胃徒空入道門衢此為要  
天隱良士工詞章經傳百家仍探討孰知抗志乃松喬  
濁利浮榮非所好年當強仕舍壯圖勇辭館餐棲窈窕  
欲仁仁至天所資道藏仙方過鴻寶衛生有藥可忘饑  
不愁煮字那能飽一從易置冰玉腸不假青精顏色好  
會驅乾馬及坤牛捕虎擒龍歸鼎竈易骨洗髓由此基

三島十洲輕可到縱未能嘗方朔桃亦須先致安期棗  
世儒悉被客塵迷志在衣錦而食稻惟君高蹈出凡流  
見謂秋陽同皞皞

和楚渡賦雙竹松梅古風

挺然昂霄蟠澗阿彼美松者非凡槎干林搖落乃孤秀  
舞春楊柳徒傒傒儵然照水溪一涯彼美梅者非凡葩  
冰姿皎潔抱清獨漫山桃李徒繁華昔人品題信不苟  
每以此木配此花伊誰挈置小盆盎高標盤曲良可嗟

然雖矯揉失真性幽香貞色仍堪誇況分瑞竹與鼎立  
歲寒之侶何以加竹尤挺特過二者逸鞭吐秀如蘭芽  
兩枝撐出露頭角一類襁褓髻未丫於中此更拔其萃  
似覺小異如孟嘉會從尺寸達尋丈摩拂穹漢生雲霞  
可親雅與書帙稱相對慎勿肉食奢君之取友莫此尚  
此友寧久留君家須知調鼎待佳實豈但水影誇橫斜  
須知大才作隆棟豈但古幹森虬蛇虛心勁節豈無用  
寧在楚楚儀容佳為龍致雨行矣神變化轟雷掣電與

世驅姦邪

與卿寓登多景樓口占立成

世稱斯樓天下奇  
雨餘振履此遊適  
埋頭旅舍氣弗蘇  
一見端能洗湮鬱  
連岡三面作襟袖  
洪流千里在履舄  
俯窺萬井若綦布  
前閱千帆似梭擲  
銀濤湧出丹碧居  
金焦兩山相對立  
羣陰解駁宿靄收  
放出脩眉數峯碧  
景名多景名不虛  
似此江山何處覓  
凭欄一笑問波神  
欲舉歸帆在何日

和張石山古風約郊行

乾坤空濶幾由旬仁氣坱圠熏為春郊原萬象列綺繡  
華哉規令方施行舊年與花嘗有約肯倦携筇并躡屨  
近來時事與花違一任自開還自落此時何地可維舟  
難效山陰楔事修醉吟有樣猶可法隨處可留無不留  
欲縱清遊先蠲屐剩擬一造芝蘭室料應紅紫尚餘芳  
但媿平章無健筆折簡支郎盟在前期弔野王今幾年  
或行或止若有制人不自由殊可憐轉頭點點飛紅雨



美景良辰那忍負大篇短牘重招邀起徃從之其取後  
但嗟戴笠與乘車昔騎紫馬今無驢榮華消歇與春盡  
寵辱不動心如如

和野渡為青溪賦

好士不論親與疎絕甘分少寧求餘孔程一見便傾蓋  
懽如故舊其非歟世多奇俊無南北平昔可曾致佳客  
吾鄉良友無出君二仲之交猶欠一青溪人瑞名聞揚  
劍氣上射牛斗光淋漓筆下走風雨其勢浩浩聲浪浪

雙鵠俱堪儕，羣鶴宜與翔。翔天地，廓一為羈羽。一全巢。  
羈者飛來慰寥寞，人生遇合天實為。遠方朋來從爾思，  
但親益友非損友。何間新知與舊知，吾儕氣臭在投合。  
有來館粲須延納，不妨北海常開樽。豈但休源乃施榻，  
我家有竹門可款。植此不徒悅俗眼，批風抹月待嘉賓。  
絕勝肉食供朝晚，嵇呂交情雖似漆。千里相遇難再得，  
何如耆俊里社全時得。親薰才學識。

鶯花吟為良友作

羽族競繁聲倉庚尤善鳴喧啾百喙忽奏雅盡洗盈耳  
箏竽音芬菲芳事畢木芍藥晚出於中姚魏更傾城掃  
退目前蘋紫色轉眼韶華便欲休恨無長繩繫春留一  
春嫵媚在花鳥常恐易逐光陰流浮蕩誰家挾彈子飛  
丸巧中俄摧翅封姨底事苦禁持飄搖欲使無完帶可  
嗟凡卉與凡禽遂情快意何紛紛不思物惡傷其類爾  
形爾氣非同羣歲購名葩不常遇日聽好音能幾度寄  
與東君力遮護勿使凋零同臭腐不然辜負鶯花主

為徐太初友人陳府判賦梅居餞行

青鞋不踏孤山路  
辜負逋花今幾度  
那知別有姑射居  
衆謂孤山未必如夙  
昔名傳尤願見渴想  
此仙難覲面  
朋來滿口譽風神  
儼若眼底逢佳人  
枝間獨具先天易  
惟有太初心默識  
雅遊擬問古航船  
索笑相親須有緣  
閨中積歲玩風月  
虐甚祈寒飽霜雪  
此往春浮雨露香  
歸來萬玉爭輝光

墓松既夷所餘無幾方植松秧自賦

重來丙舍歲三易翠巘插空仍兀突喬林鬱蒼穢斧斨  
一二僅存於百億參差歷落更孤秀不假依憑而挺立  
宛如九老瑞唐朝又類耆英隆宋室合茲異代衆君子  
仙去一朝於此集千夫束手何敢向萬牛回首難容力  
已芟嘉植勿復論壽此仝期不朽骨稚松匝地散新秧  
頭角森森紛羽翼他年雨露飽沾濡滿鼻珠璣香習習  
會須百尺長龍身仍復層林森鳳翼作詩聊記角弓章  
子子孫孫永培植

和南塘詠梅

剥極大冶如死灰潛陽初動生意回沖融一脉貫萬彙  
物有清氣拂斗魁嘉植幾世培其栽孤芳欲折猶裴回  
此花消得酒百杯料君恥與紅紫偎祇應兩屐磨蒼苔  
豪飲豈惜玉山頽醉中兩手敲復推句成不假擊鉢催  
青皇襟量何恢恢任教殘臘偷春來暗香明艷無纖埃  
俯視衆植為陪臺紛紛盆盎見古壘千花錦繡徒成堆  
天然不假冰玉裁歲歲為渠青眼開

過瓜洲

偉哉千里萬里流，袞袞其來自巴蜀。奔騰澎湃入尾閭，  
勢雄何啻吞百谷。金焦對峙兩鰲浮，千頃玻瓈浸其足。  
光生金碧殿閣湧，氣蒸紫翠林叢沃。附庸更有小陂陀，  
東晉詩仙卧其麓。穹龜長蛇簸風雨，鬼怪神奇不可觸。  
地靈設險莫此如此天，所以限南北。江山終古無變遷，  
世運如輪幾翻覆。英雄滅沒去不反，人事紛輪轉相續。  
嗟予蟄處幾二紀，殆類龜藏蝸局縮。茲來雲夢氣可吞，

浩蕩乾坤在吾目  
靴紋獵獵日流輝  
鬢黛蔥蔥雨初沐  
沙禽雲鳥自往來  
浪舶風帆互征逐  
埜芳零落舞殘紅  
汀草蒙茸漲平綠  
爛然宇宙一丹青  
絕勝鵝溪千畫幅  
歸舟那得大如川  
載取江頭春萬斛

和陸象翁以梅配竹

駢頭始生為籜龍  
森然而立列羣玉  
琮琤有韻天籟鳴  
蓊鬱成陰雲氣簇  
楚楚少年來自河  
猗猗君子瞻彼澳  
其實曾致雛鵝來  
其枝可留棲鳳宿  
月香水影猶更奇



彈壓春花千萬屬羞為西子事塗抹喜作道韞淡粧束  
不居驛路即溪橋好傍巖腰與山腹謂宜作妃以相從  
雅韵幽姿俱不俗此君何以待美人翠帷重重富羅縠  
美人何以奉此君碎玉明珠不論斛於中更有無價香  
迴勝龍涎與麝馥此君挺特氣不凡美人窈窕姿尤淑  
執柯者友秦大夫不煩月老繩紆足且善為醪以合歡  
味過蒲萄及醪醕梅之所見乃不然謂恐為人所指目  
從來潔白不可溷每鄙仙人華萼綠彼固無嫌為丈夫

予寧屈體而雌伏不如仍作歲寒交永為貞女甘幽獨  
自王園歸約諸友山行

天不憐我老且貧荒邈不可酬華春遂令東里互邀致  
借之雙圃娛芳辰癡雲釀雨雨旋止霽日含輝更清美  
花間盡畧得盤桓但費東君為料理歸來未久簷溜傾  
乃信造物真有情十分淑景一分在但願從此天開明  
一方一曲春有限芳菲未足舒老眼扁舟遠欲逐清華  
錦繡山川窮勝賞維此林巒地雖窄聳秀流芳亦不惡

安得良友相追隨  
步屨生香徧行樂  
只恐囊無賀老詩  
不愁屐費阮生蠟

五雲詩

千巖萬壑東南美  
中有一山尤秀偉  
伊誰衣被以佳名  
非霧非烟騰瑞氣  
有人於此曾課書  
出山能士為寫圖  
風林泉石振清響  
佔畢吟誦聲難模  
聚為胸中綫五色  
不補衣裳華袞散  
迺作江湖漫浪遊  
奮蕩揚葩肆吟筆  
文為人瑞要瑞時  
時不與我文奚為  
何如抱書還舊隱

姑頌楚橘歌商芝吾衰一字不解作平生學殖嘆荒落  
為儒無用擬修玄徒想仙人五雲宅

春歸

紅飛綠膩晴晝遲木香滿架柔條披芳菲過眼能幾日  
娛樂常少多憂悲東君歸計何太早四序光陰如電掃  
今年花謝復明年祇使看花人易老蕭然白髮朱顏蒼  
競春肯學兒童狂不如坐對歲寒木清談與客窮書囊  
送龍孝梅過上海及見郊外巨室

宇宙清淑物絜齊春工告成青帝歸雲縫霧織翠萬幄  
尤勝紅紫芳菲菲高人出郊窮遠目一童兩屐隨所之  
五茸三泖在指顧收攬萬象歸詩脾袖中三尺貫牛斗  
劍光到處神魂悲肘間更有不傳妙禍福隱奧能前知  
高門懸薄奚待往候迎紫氣爭先馳此行直須訪海若  
揮斥物怪搜珍奇連鰲自可赤手取何用釣糖五十為  
十洲三島不難到御風騎氣從安期願君斯遊姑少遲  
為我六月開南枝

和唐人惜花韵

一年最是花時好  
花開莫待鶯呼老  
有酒對花勿草草  
清唱美人眉淡掃  
一觴一詠要相當  
櫂船喚取黃頭郎  
川原紅紫相低昂  
載取十里春風香

新暑賦西軒竹

此君與我同襟期  
延致屋宅西南維  
涵濡雨露歲未半  
柯葉深茂華而滋  
恍疑神士萃庭宇  
旌幢羽蓋紛交馳  
非箏非竽發天籟  
不湍不瀨含風漪  
綠光到眼冰雪潑

頓令六月無炎威何須挹爽置象簟不假去熱施龍皮  
挺然直節異凡植四時不改琳琅姿脩然雅致滌萬慮  
一塵不染珊瑚枝明蟾寫真銀散彩騰烏弄影金流輝  
千林剝落氣愈勁更好雪壓并霜歌無山無水自幽勝  
雨天霽景俱相宜方嗟此地翳草莽幻出臭腐為神奇  
恨無與可圖作幃消得坡老模成詩中虛而靜有隱德  
妙氣獨有予心知年今七十諸妄屏久壓花本芳菲菲  
締交惟汝與松栢嘯風吟月相追隨願言棲鳳同作伴

慎勿化龍隨所之武公勲業我所媿猶覩老壽幾耆願

次韻憫雨

百穀仰雨而蕃滋乃穎乃苞乃成實鍾雲方喜高下齊  
大田俄報東南坼民窮至此噫亦甚無年餓死其無日  
佛靈猶未致涓流人力焉能施寸尺况當十室九室空  
可堪百里千里赤仰天無路扣彼蒼望雲自旦尋至黑  
一歲不稔百沴生所憂豈止人艱食聲嗟氣歎方載途  
屈莫求伸枉莫直繇來有感則有應影響一機端可必



時遷事改理不移今日天工豈殊昔烹羊乃雨古語云  
何假雷師起河伯調元贊化更有人怪魃螟蜥俱蝥跡  
人心既悅天意從利澤須能致甘澤油然沛然苗勃興  
奚用象龍施五色

賦竹深處

淇園既往不足論渭川徒多未足貴森然玉立闢幽深  
彌望恢恢有餘地何異東亭手親植遂使南陽日清閔  
綠雲障日間弗容翠濤翻空杳無涖冥冥韓林靜而秀

窈窈蔣逕深且邃洗清袪暑迴莫留截斷俗塵飛不至  
何須層冰置几案自然涼氣生衣袂吟弄風月騷人徒  
伯季松梅歲寒味於斯二仲可論交誰為六逸宜邀致  
何時徒步許直造著我其間同一醉祇恐君疑庾亮來  
角巾豈免還私第

宣妙墳院古栢

古來喬木產墓宅新甫之儔匪凡質風梳雨沐三百年  
聳壑昂霄過千尺孤標屹立獨擎天繁柯偏重常傾日

蒼皮剝落節理堅挺挺長虬初蛻骨我來屢見此崛竒  
摩挲老眼增雙碧吁嗟松檟幾遷易拱者芟夷新者茁  
青青惟此貫四時物換人非飽更歷栽培意有天地根  
不然守護資神物須知碩果不徒存天佑吾宗當默識  
公侯復始此其符衮衮人英須輩出偉才未許萬牛挽  
香葉擬留孤鳳集千秋要與此山存世世宗盟共封植  
和新篁韻

竹君清絕潤於玉譜牒出自淇之澳移根分種置吾廬

纔隔樊牆即家塾塾之所有無非書師友摘文剪其蕪  
此君兒郎趣亦雅駢頭相過紛鋪舒鮮鮮綠色照鄴架  
駸駸宗祖可方駕鈞章題品得騷翁倍使新篁長光價  
矛甲鏦鏦看擊雲未遜六千君子軍琅玕一一如椽大  
此中更有風月存巨細何異公領孫低昂尤若主承賓  
有賓如君誠可人西牕六月暑如焚會見為君滌除熱  
惱來涼薰

墳院新篁

琅玕挺秀徑尺盈森森直上摩蒼冥封培保護猶重器  
歲餘二十林方成繩繩孫子更傑出遠過鼻祖尤輪囷  
蔚然翠羽漸成葆稚者碧玉初抽簪泥塗甫見露頭角  
意氣已欲生風雲繁枝會致鳳棲止修幹能作龍飛騰  
我來其下避新暑洒若澗壑涵層冰清高直亮異凡種  
願言世與山長青綠漪豈但為目玩於焉觀德知修身  
吾宗叡聖所宜法如圭如璧揚休聲

用前韻

世更日月幾景盈依然有谷中窈冥脩筠夾道互經緯  
宛如一機翠織成非繇培植得攬玩何異不稼而有因  
擇龍个个出頭角密者櫛比疎猶簪嬋娟色媚已映月  
團欒氣合行屯雲雨餘尋丈忽聳拔其上速若鳶肩騰  
中邊別種相間邁又類潤玉陪清水我將於此事著述  
編摩自足供殺青此君時對吐秀句榆境亦不孤閒身  
涼床滑簟午睡足坐聽雅奏來風聲

夏秋積雨歲用大侵長言紀實

四月五月淫滂積噬嚙丘垤吞原隰匪惟為沼蕩為陂  
萬頃秧雲泯無跡攢鵝聯尾空飛翻化鰲為城難障塞  
五湖三泖欲貫通浪接重江勢洶湑茅茨比屋何可存  
穀麥千金不論直懦夫全室葬魚腹强者呼儔作蝨賊  
閉糴成風牢莫回勸分有令徒無益間存壠畝護餘苗  
曾不什一于千百旱赤堅粟刈未齊晚紅穠稭苞欲實  
饑農競喜新穀收一飽充腸云可必夫何八月天瓢傾  
其來震蕩而飄忽勢如陣馬奔不停銀溜浪浪欲穿石

直疑羣龍翻九河小山搖撼大山兀須臾泛溢滿中庭  
平地如淵深計尺明朝清野變白波浩浩湯湯彌甚昔  
積陰為冷不堪收殆類鴻濛未開闢又如歷代政昏蒙  
熏如宇宙成幽墨飈旋霧塞晝冥冥常俾蒼生氣湮鬱  
簷間點滴無時乾猶幸滂沱間霖霖登場惟苦禾耳生  
棲畝尚有禾頭出深虞袞袞傾盆來已壞垂成俱滅沒  
大家蓋藏悉已空猶恐有司徵斂急若使租無斗斛收  
卒歲輸官何自給貧家新桂米逾珠待哺罄罄併日食



若使粒價更湧騰寧不枕藉為溝瘠彼蒼亦必憫時艱  
忍視斯民至斯極我念民窮作此歌歌此能令鬼神泣  
鬼神為我訴之天天豈不惟民是恤似聞詔下驅六丁  
翦夷水怪殲羣慝怒霆笑電悉屏除抉雲推上紅輪日  
更願陽烏溥至仁大放光明照幽仄鬱者斯通枉者伸  
頓蘇民氣舒民力洪波卷空九土晞多稼穰穰登黍稷  
庶令千里免阻饑可反愁邦為樂國

立秋喜雨

炎炎老火燒太空熏灼萬類勢欲鎔高田幅裂稼已腐  
低壤釜沸禾生蟲金蛇飛走天鼓震須臾散滅茫無踪  
火輪烈烈揚熾焰夜鏡炯炯摩青銅老夫望歲甚田叟  
恨無神術驅羣龍平明披衣視雲氣霧靄四合何冥濛  
沾濡俄頃遂滂沛奔騰浩瀚猶崩洪雨珠雨玉何足貴  
雨菽雨粟亦有窮涓流膏潤入秉穗穰穰九穀苞其中  
良疇何啻萬萬頃一稔困櫛過崇墉溢為懽聲沸比屋  
洗空愁嘆蘇三農亦知誠感斯響答古佛之一真圓通

嗟吾年來生計蕩殆若枯葉隨飄風甌窶汙邪不應禱  
凍餓真與窮民同繼今甘霖願時有鼓腹擊壤歌年豐

用韻再作

一氣運行於虛空有形孰不歸陶鎔燠寒燥濕互為用  
功被草木并昆蟲胡然陽亢乃作沴靈霍屏翳俱潛蹤  
炎炎赫赫勢太甚烹煎萬有何殊銅田疇龜坼河港斷  
水車不運骨掛龍俄驚片雲變反掌宇宙未剖猶鴻濛  
初如綫溜氣纔應繼若瓴建聲何洪豈徒神力能致此

意者高厚悲人窮豐凶由數亦匪數厥有造化行其中  
年來五穀亦狼戾曾孫之庾高於墉祗今戶戶嘆赤立  
富者恨不為耕農要知千人萬人心心心默與天相通  
熙熙田畯爭薦喜烹葵剥棗追幽風更看十月場圓築  
黃雞白酒村村全但祈田祖去螟螣願如荆叟歌元豐  
賡南塘桂吟

卉木搖落如齒牙紅紫淨盡無浮花秋芳俄從天上至  
人世有香誰敢誇纍纍金粟疊為蕊風韻別自成一家

蔥蔥綠玉不改色歲寒氣節何以加滋榮豈但壓衆植  
纖巧直可凌春華一枝纔折聞四表芬敷發達其無涯  
看花花好時亦好到眼不覺忘聲嗟君家喬木知幾載  
世世封植今彌嘉來章璀璨耀珠壁行墨邁勁飛龍蛇  
我營小圃富靈種丹犀列樹尤豪奢虛堂中夜忽生白  
扶疎清影來牕紗世間萬事等塵土何苦閉縮如藏蝸  
只今有酒爛醉廣寒下但恨無鼓可作漁陽槌

壽南塘八月生朝

一年最好八月月此月迴與尋常別君於厥月乃誕彌  
天一之精所凝結涵精毓秀宜不凡神如秋水膚如雪  
蜚英騰茂載宦途所至光明而煒燁一簾瑩徹照今古  
妙凝夜氣冰霜潔芬芳滿腹貯天香吐出篇章更奇絕  
所存者厚養者深晚歲丰姿尤發越不知何物敢相干  
屢月光華似消歇直疑蒼狗互掩蔽恨無長軀可手抉  
又類妖蠶初啗餅恨無利劍可殲厥一朝天為掃妖邪  
銀輪爛爛仍高揭久嗟湮晦忽清明儼若身居廣寒闕

相將誕節紀祥弧連夕金波倍澄澈誰云弦望有盈虧  
須知本體原無缺滿堂子女競稱觴比似常年更懽悅  
月中自有藥長生不勞復問長生訣從今夜夜長輝光  
年年月月無磨折刀圭無惜惠令人使我頽齡起疲茶  
和吟友月夜遇風雨不見薄蝕韻

麟經紀載浩歲月天家妖祥互分別所書薄蝕三十六  
獨於黑夜泯無說豈以為陽義所崇可畧者陰辭遂輟  
曩年月蝕無風雨風雨胡為為月設三百六旬惟此宵

羞使望舒顏面缺第怪飛廉逞怒號擺撼廣寒枝欲折  
海濤助勢捲地來萬戶千門一時撤天目駝龜秦望搖  
奚問區區小丘垤明朝揭日出虞淵疑是天工手親挈  
羣陰散駭世清夷蛟螭那復為妖孽我欲作詩頌陽明  
文思久枯筆屢掣但願合璧常光明年穀順成風雨節  
中秋把酒對嫦娥處處團圓天下悅

喜晴

竭來古寺當初寒垂垂凍風不肯乾出門泥滓跬步艱



蟄處無異虬蛇蟠剪花呈瑞天破慳鑄出八九銀嶺  
使居城市那得看銜耀老眼真奇觀雲然陽明忽開張  
俄復飛溜聲潺潺癡雲布濩封乾端冥濛莫覩雙跳丸  
噫氣夜號力撼山平明推上赤玉盤羣陰解駁宇宙寬  
草木禽鳥俱懽顏金烏行空振羽翰揚輝散彩送我還  
却憐殘蠟猶欠三日不屢數歲欲殫盈尺為瑞俄頃間  
天公變化應無難

和催雪

我欲問天天穹窿歲卜其有於歲終胡然玄律欲道盡  
燠乎一歲融而冲凍膚未起玉樓粟寒力尚怯珠槽紅  
臘前三見瑞盈尺九土斯農之望同沍寒雖以雲布漢  
合影尚欠宵通朧梁園徒聚為賦客灞橋更誤能詩翁  
倩誰剪下銀潢水六花人代天施工不必作威藉風伯  
不必布勢勞豐隆預占多稼滿周畝首驗小麥連崢峒  
嘗聞玉妃從者萬要看羽衛來仙宮未多劉子比西閨  
抑陋衛人歌北風撐腸吐出冰雪句清輝交映彌寒空

列岑銀鑄增突兀千林楮刻森玲瓏瑶芝一望千萬頃  
不辨田上田中中憶昔臘霏點予鬚至今皓首如飛蓬  
自憐老朽難用世祇堪把耒勤農功行天須見度有馬  
入地庶使潛無螽年豐常願頌秋報豈止擊壤歌三農  
和雪吟

庖無美炙惟野菽爨無積薪用勞軸夜半烹酒和雪吞  
膳喜吾廬銀作屋須臾清氣散入脾不覺吟肩樓聳玉  
映書更宜剔魚蠹擁被那肯作龜縮飽看衮衮來玉塵

追壁斷圭隨所觸地凝瑞氣盈欲尺水剪飛雲出猶六  
化工纖巧妙無倫春卉秋葩總成僕最欣歲歲為農祥  
散作陽和徧雲谷去年一白兆年豐幸為民力舒窮蹙  
今年將見臘前三欲為民生洗荼毒不思金帳飲羊羔  
不思朱門厭酒肉目前多幸苟全生稍得伸眉猶勝哭  
可憐赤子寒欲僵生理不遺升斗蓄憂時老杜徒詠嗟  
破廬凍死寧令獨閉門猶喜得高眠絕勝魯公書食粥  
和家則堂韻贈高教之北

別時欠折蘇堤柳西方美人無恙否子卿鬻雪十九年  
何似生前一杯酒麒麟胡可係而羈要使為祥在郊藪  
當年誰擅西湖春公間遺臭千載後但知金屋醉蛾眉  
簸弄威權翻覆手徒勞吉士遠有行令人驕驕賦維莠  
君今重整燕薊轅老子是然欣得偶殷勤為我問平安  
司馬深衣想如舊

贈范道人

道人以任子為庾臺幕  
官不受省府差符從道

黃紙差符不肯留飄然願逐雲水遊紆朱拖紫不肯慕

甘著草衣披布素金珠斗量佩鳴珂所得懽華能幾何  
形氣日隨情欲蠹曾不百歲同臭腐學仙豈必便成仙  
人世且結清淨緣弘景寧為軒冕錮子平未免婚嫁累  
有田有廬垂弗歸有子有女棄若遺道成却往楓城郭  
化作千年令威鶴

舟回自雪至黃橋風大作復反朱涇泊舟

芒屨徧踏苔溪岡昌翔歸棹穿滄浪吾廬咫尺自可到  
飛廉怒吼俄作狂濤頭掀舞勢欲立紛紛雨霰來何滂

河伯怙此賈其勇杯水幾至傾倉皇急呼轉施依古剎  
道場千載揚靈光我今七十僅三到更覺古檜蒼髯長  
應為舩子笑寂寂老無聞達徒奔忙明朝風靜日欲杲  
載欣衡宇升吾堂波濤盖有起平地覆車未必非康莊  
人生夷險與利鈍惟有委順於旻蒼

為湖州趙村淨妙庵主僧賦

自披五戒如來佛十年面壁坐天目歸來滿袖唯白雲  
徒得聲名喧世俗碧玉嶙峋煙霧堆鑿開混沌架突兀

不鞭而來爭獻助斬木指困人不惜僧寮佛屋俱落成  
撐空只欠塗金碧精廬不獨為安身海納諸方禪悅食  
上人湛然一太虛真覺端由真淨得是心已證涅槃心  
妙處豈容言語詰故於題扁發其機要使人人箇中覓  
學徒釋侶有能然從茲作祖而成佛大展坐具闡道場  
勝地名山須卓錫法筵乃見龍象尊天池且作鷗鵬息  
書來謂逮菊花期蓮社紳綏應畢集遠師如肯致淵明  
亦擬袖香躋丈室



